

RESOLUCIÓN REITORAL DO 21 DE FEBREIRO DE 2013 POLA QUE SE FAI PÚBLICA A INSTRUCIÓN QUE ESTABLECE O PROCEDIMENTO PARA O DESENVOLVEMENTO DAS PRÁCTICAS ACADÉMICAS EXTERNAS EXTRACURRICULARES NA UNIVERSIDADE DE VIGO.

Co obxecto de racionalizar a tramitación de expedientes e posibilitar o cumprimento do regulamento de prácticas académicas externas do alumnado, na súa modalidade de prácticas extracurriculares, da UVIGO , aprobado no Consello de Goberno de data 24 de maio de 2012, de conformidade co artigo 21 da lei 30/1992, do 26 de novembro, de réxime xurídico das administracións públicas e do procedemento administrativo común,

DISPOÑO:

1. Definición e características xerais

- a. Son prácticas externas extracurriculares aquelas que se realizan con carácter voluntario durante o periodo de formación e que, áinda tendo os mesmos fins que as prácticas curriculares, non forman parte do correspondente plano de estudos.
- b. A organización docente das prácticas extracurriculares farase no sistema ECTS, de cara ao seu reflexo nos expedientes académicos, no Suplemento Europeo ao Título, e en calquera outro documento acreditativo, e para facilitar o seu posible recoñecemento e/ou transferencia. Quedarán reflectidas no expediente académico da persoa que as realizou e, de selo caso, no Suplemento Europeo ao Título correspondente.
- c. A súa duración e horario estableceranse procurando garantir o correcto desenvolvemento e seguimento polo alumnado do resto da súa actividade académica. Terán preferentemente unha duración non superior ao 50% do curso académico.
- d. Os dereitos e obrigas de alumnos/as, titores/as, Universidade de Vigo e entidades, serán os establecidos no Real Decreto 1707/2011, de 18 de novembro polo que se regulan as prácticas académicas externas dos/as estudiantes universitarios.
- e. O alumnado que realice prácticas externas extracurriculares disporá dun titor académico que formará parte do profesorado da Universidade de Vigo, preferentemente da mesma titulación que o/a estudiante ou, en todo caso, da mesma Rama de Coñecemento das ensinanzas para as que estea dirixida.
- f. Cada centro nomeará un/unha responsable de prácticas externas que se encargará de asignar as titorías ao alumnado que realice prácticas externas

Universidade de Vigo -
Registro Xeral

Saída Nº. 201300003097
21/02/13 09:10:21

2. Xestión de prácticas externas extracurriculares

A tramitación e xestión das prácticas extracurriculares realizaase pola Fundación Universidade de Vigo (FUVI) segundo convenio asinado para tal efecto entre a mesma e a Universidade de Vigo.

A Vicerreitoría con competencias en relacións internacionais poderá tramitar e xestionar prácticas extracurriculares no estranxeiro, así como promover os convenios de cooperación educativa correspondentes. En calquera caso, xestionará as prácticas que se realicen ao abeiro de programas de intercambio Internacionais.

3. Procedemento de xestión e adxudicación de prácticas extracurriculares

- a. As prácticas xestiónanse baixo o convenio de cooperación educativa para a realización de prácticas externas asinado entre a Universidade de Vigo e as entidades colaboradoras.
- b. A Fundación e/ou a Universidade realizarán convocatorias públicas nas que se indicarán as ofertas de prácticas realizadas polas entidades colaboradoras.
- c. A preselección do/a estudante en prácticas será realizada pola FUVI co obxecto de garantir o cumprimento dos requisitos legais que a normativa establece.
- d. No caso de existir máis solicitantes de prácticas que prazas ofertadas, terán prioridade na preselección aqueles alumnos ou alumnas que non tiveran realizado prácticas externas anteriormente.
- e. A selección final do/a candidato/a elixido para a realización da práctica corresponderá á entidade colaboradora.
- f. Co obxectivo de favorecer a realización de prácticas, e de xeito excepcional, o alumnado poderá promover a súa propia práctica nunha empresa ou entidade. As prácticas ofertadas por entidades ou empresas cubriranse en todos os casos a través de convocatoria pública.

4. Requisitos do alumnado

- a. Estar matriculado na Universidade de Vigo nas ensinanzas para as que se ofertan as prácticas extracurriculares. No caso de estudiantes de grao, ter superado o 50% dos créditos necesarios para obter a titulación.
- b. Poderán así mesmo realizar prácticas extracurriculares aqueles/as estudiantes que estean realizando o proxecto fin de carreira, ata a presentación do mesmo.
- c. No caso de que o/a estudante só teña pendente o proxecto fin de carreira permitírse unha ampliación da práctica outros 6 meses, sempre e cando o proxecto estea vinculado á realización da mesma.

5. Xornada

- a. A xornada diaria aconsellable será de 5 horas.

- b. Excepcionalmente a xornada poderá ser superior ás 5 horas diárias, nos seguintes casos:
- Durante os períodos non lectivos ou cando se xustifique a non existencia de carga lectiva durante o período de prácticas.
 - Se ao/á estudiante seleccionado/a só lle quedan por superar 12 dos créditos necesarios para rematar unha titulación media, e 15 créditos no caso de titulación superior.
 - No caso de prácticas extracurriculares internacionais, a xornada diaria establecerase de acordo cos usos e costumes para prácticas de formación en dito país, e nunca poderá superar a xornada laboral máxima no mesmo. En calquera caso, a xornada diaria establecerase de xeito explícito no acordo de formación correspondente (training agreement/statement of placement details).

6. Duración

A duración será dun máximo de 6 meses por curso académico e poderán realizarse ao longo de todo o ano. No caso de prácticas extracurriculares ao abeiro de programas internacionais, atenderase ao disposto na convocatoria correspondente.

7. Bolsa de prácticas

- a. A empresa ou entidade convocante da práctica concederá unha axuda con carácter de bolsa. No caso de prácticas extracurriculares ao abeiro de programas de intercambio onde se contemple a concesión de axudas ao estudantado con carácter de bolsa, poderase eximir á empresa ou entidade a concesión de dita bolsa.
- b. O importe da bolsa será proporcional ao Salario Mínimo Interprofesional no país onde tengan lugar as prácticas extracurriculares, en función do número de horas realizadas.
- a. Será opcional a dotación económica da bolsa nos seguintes casos:
 - Para organismos públicos e as entidades sen ánimo de lucro durante un máximo de 3 meses.
 - Durante o tempo equivalente a 240 horas. Aplicable unha única vez por alumna/o na mesma empresa.

8. Esta instrución entrará en vigor ao día seguinte da súa publicación

Vigo, 21 de febreiro de 2013

O Reitor

P.D. Resolución Reitoral de 5 de setembro de 2011

(DOG nº 176, de 14 de setembro de 2011)

O Vicerreitor de Transferencia de Coñecemento

José Antonio Vilán Vilán



Diligencia para facer constar que esta resolución se publica con data de hoxe no taboleiro de anuncios do Rexistrio do Campus de Vigo desta Universidade

Vigo, 21 de febreiro de 2013

O Secretario da Vicerreitoría de Transferencia de Coñecemento

Alejandro Martínez Gómez

